

儀

顧

堂

續

跋

儀顧堂續跋卷第十

歸安陸心源伯剛甫著

元槩晏子跋

晏子八卷前有總目目後有劉向奏每卷有目連屬
篇目每葉十八行每行十八字與吳山尊重摹影元
抄本同惟吳刊版心分八卷此本卷一至卷四版心
刊晏子上卷五至卷八刊晏子下稍有不同卷八末
章公曰章下此本注缺吳本有吾失晏子未嘗聞吾
不善章曰君好臣服君嗜臣食尺蠖食黃身黃食蒼
身蒼君其食諂人言乎公曰善賜弦章魚五十乘弦

章歸魚車塞途章撫其僕曰曩之唱善者皆欲此魚也固辭不受與御覽九百三十五引同吳勉學本分七篇二百三章缺十二章萬厯子彙本以卷七重而異者雙行注于內篇各條之下卷八至第十七章止缺第八章經訓堂本出沈啓南校刊本分爲七卷以外篇七八兩篇合爲一卷卷八第十八章公曰章下多百餘字與御覽所引及吳刊不同與治要同外篇每章皆注其箸于此篇之故當是劉向舊文各本無之均不如此本之善子彙本有潛菴子識云今刻本分諫間雜上下六篇重而駁者二篇每章復括大義

爲標目甚有次第云云則周氏刊子集時所見亦此本也卷四後有徐燧惟和識云萬厯戊戌中秋購于閩門肆中下有徐燧私印白文方印惟和朱文橫長印每冊有徐燧私印朱文方印幔亭峰長白文方印鄭杰之印白文方印人杰朱文方印注韓居士白文方印鄭氏注韓居珍藏記朱文長印案徐燧字惟和福建閩縣人萬厯戊子舉人箸有幔亭詩集鄭杰字人杰侯官人乾隆貢生其藏書之所曰注韓居藏書數萬卷分二十厨貯之以東壁圖書府西園翰墨林誦詩聞國政講易見天心爲誌是書元本流傳尙多

孫淵如作音義時所見盧抱經作羣書拾補時所見
皆與此本同卷八第十八章公曰章下皆注缺字何
以淵如所贈山尊影抄本獨全與御覽一字不異竊
疑黠者以御覽補完僞作影元本以愚淵如淵如以
贈山尊山尊遂以梓行耳然其文固見御覽非僞也

元槩呂氏春秋跋

呂氏春秋二十六卷次行題十二紀八論六論篇名
二行題百六十篇篇名四行題呂氏春秋訓解下題
高氏前有鄭元祐序高誘序總目後有鏡湖遺老跋
每葉二十行每行二十字小字雙行版心有青字上
有大小字數北宋時餘杭有刊本亡三十篇脫漏三
萬餘言元豐初東牟王氏奉詔修書于資善堂取太
清樓藏本校定元祐王申鏡湖遺老賀方回得此本
于京師手爲校定元初其本歸于海岱人劉克式字
居敬號節軒者其子名貞字廷幹至正中爲嘉興路

總管刊之嘉禾學宮此則嘉禾刊之初印者畢氏經
訓堂刊祖弘治李瀚本李本及嘉靖許宗魯本亦從
此本出每冊有元本二字朱文長印張月霄印朱文
方印愛日精廬藏書朱文方印

元槩大字白虎通跋

白虎通德論十卷題臣班固纂前有大德乙巳中奉
大夫雲南諸路行中書省參知政事東平嚴度恪齋
題下摹刊度字陽文方印恪齋陽文方印魯台陽文
方印大德九年克齋張楷序下摹刻東平張楷陽文
方印衛甯陽文方印克齋陽文方印後有缺名兩跋
每葉十八行行十七字每篇文相連屬不分章卷一
爵號諡卷二五祀社稷禮樂卷三封諸侯京師五行
卷四三軍誅伐諫諍鄉射致仕辟雍災變耕桑卷五
封禪巡狩考黜卷六王者不臣著龜聖人八風商賈

卷七文質三正三教三綱六紀卷八情性壽命宗族
姓名天地日月四時衣裳五刑五經卷九嫁娶卷十
縞冕喪服崩薨凡四十四篇與崇文總目邵齋讀書
志直齋書錄解題合爲宋以後相傳之本闕名跋所
謂監本者也是本爲大德九年無錫學者儒李顯翁
晦借州守劉平父藏本所重雕嘉靖傅鑰本雖從此
出間有改易併爲二卷盧抱經校刊是書初亦未見
元刊後始于蘇州朱文游家借得箸其說于補遺然
如爵篇比爵爲質故不變下元本複出爲質故不變
五字進賢達能爲下無卿字大夫下無王制云上大

夫卿七字士冠經下元本有日字所以繫臣民之心
下無也三年三字然後下無受字盧校皆未及此外
異文之未校者尙百十處或以刊成在先雖借文游
元本並未詳校耶元本于逆子劍之誤爲迎子劉尙
存其舊特著其說于跋可謂慎之又慎餘皆仍舊斷
無改易可知盧校盡依羣書所引增改且有諸本所
無羣書無證而改易者未免篤于信旁証果于疑原
書矣毛氏秘書本書目大字元板白虎通二本今仍訂
三冊蓋猶毛氏舊裝每冊有毛晉之印毛氏子晉朱
文兩方印毛辰之印斧季朱文兩方印宋本朱文楷

圓印甲字朱文方印毛晉朱文連珠印毛晉私印子
晉朱文兩方印宋筠朱文方印蘭揮白文方印張楷
序前有顯親王府圖書之印白文方印案宋筠爲商
邱宋犖之子汲古閣祕本書目爲潘稼堂開值議價
不諧其書多爲商邱宋氏所得故有蘭揮兩印此流
傳源委之可攷者平父名世常許衡弟子收書不啻

萬卷

明仿宋槧東觀餘論跋

東觀餘論二卷題左朝奉郎行祕書省祕書郎黃伯思撰前有萬曆甲午項篤壽重刊引後有紹興丁卯黃訪跋嘉定年樓鑰跋後有莊夏跋無名氏跋每葉十八行每行十八字語涉宋帝皆提行學津討原本分卷略同而刪削奪譌甚多卷下御書閣記跋下半登閣敬視美成就章因覽是碑愛其文辭遂躬錄之二十二字誤連杜正獻草書跋其退也直下而以真誥書秦漢間事跋右此前十條云云三十五字連接御書閣跋任大師弟下又以杜正獻草書跋心勁

氣云云十九字爲真誥跋舛譌幾不可讀又移祕閣
續帖跋杜正獻草書兩跋于前而移崇甯書真誥二
跋及真誥秦漢間事標目于後卷末少大丞相李公
序校定杜工部集觀文葉公跋索靖章草急就篇許
翰祭長睿文翁挺讀許公祭文四篇李忠定所撰墓
誌銘則改爲附錄又缺莊夏跋無名氏跋其他小注
刪削猶多不及此本遠甚莊夏序少前一葉首行存
莊夏書于籌思堂一行後跋云是書刊于庚午之秋
明年正月得公書又校示一百五十餘條塗者一百
五十一注者三百一十七乙者四貼改四百四十六

字并以邵資政攷次瘞鶴銘文附于卷後云樓跋後
有跋云川本去三十一篇皆在可刪之域若跋師春
書後一篇後已有校定師春序又跋于祿碑後及跋
鍾虞二帖後皆是重出當刪其餘二十八篇不若存
之以全其書云云與攻媿序書法彷彿疑亦攻媿作
案莊夏字子禮泉州永春人淳熙八年進士知興國
縣開禧三年除祕書郎嘉定元年除著作佐郎四月
爲江東提舉二年除江東運判四年除尚右郎官官
至兵部侍郎敷文閣待制見中興館閣錄景定建康
志福建通志攻媿所謂著作莊子禮欲求善本傳後

者也庚午爲嘉定三年子禮時爲江東運判景足建
康志書版門有東觀餘論二百一十版當卽莊所刻
也書中小注有伯思自注者有攻媿校注者莊跋所
謂注三百一十七是也毛子晉跋以爲出項篤壽者
因謬或以爲皆伯思自注者亦非也攻媿之跋爲子
禮詳校是書而作莊跋所云明年正月得公書者公
卽指攻媿也紹興丁卯黃訥刊本十卷今不得見其
以川本校補併爲二卷刪師春書跋疑皆攻媿所定
或子禮所爲惜跋缺前一葉未敢臆決耳

朱竹垞手抄寶退錄跋

寶退錄十卷題曰大梁趙與峕朱竹垞手抄本每半頁十行每行十八字前有與峕自序半頁五行行七字是摹與峕手書凡遇本朝國朝皇朝國初聖旨禁中上諭至尊聖世及太祖太宗真宗仁宗光獻英宗宣仁后神宗徽廟哲宗欽宗郭皇后高宗孝宗太上皇太子等字皆空一格蓋照宋本摹寫者第十卷末有臨安府睦親坊南陳宅經籍舖印一行蓋从宋板照錄者後有與峕續記張燕昌手跋稱爲竹垞早年手錄有謄字而無俗體驗之信然嘉慶間刊本卽从

此本出惟中間空格皆連寫矣

宋槧夢溪筆談跋

夢溪筆談二十六卷題曰沈括存中首括自序連屬目錄後有乾道二年湯修年跋每葉二十二行每行二十字語涉宋帝皆空格每條首行頂格次行低二字卷七登明下注曰登字避仁宗嫌名卷十二十三瑋字慎字卷二十六完字皆爲字不成是書揚州公庫先有刊本乾道二年周某知揚州復刊版置郡庠此其初印本也卷中有許元方印朱白文方印季誦氏朱文方印曾在李鹿山處朱文長印礎卿二字朱文長印當湖小重山館胡氏珍藏朱文長印毛氏津

逮祕書本卽從此出惟語涉宋帝不空格商氏稗海
本及馬氏單刊本有補筆談續筆談所據當別一本
張氏學津討原本筆談二十六卷卽津逮舊板其補
筆談二卷續筆談一卷則據稗海本補入非毛刊所
有也許元方字季誦蘇州人胡爾墉號笛江道光中
海甯人其藏書之所曰小重山館與錢警石友善蓋
明初爲沈民則所藏後歸許季誦道光中爲胡遂江
所得

元刊冷齋夜話跋

冷齋夜話十卷目後有跋云是書僧惠洪所編也洪本筠州彭氏子祝髮爲僧以詩名聞海內與蘇黃爲方外交是書古今傳記與夫騷人墨客多所取口借舊本訛謬且兵火散失之餘幾不傳于世本堂家藏善本與舊本編次大有不同再加訂正以繡諸梓與同志者共之幸鑒至正癸未暮春新刊後有三衢石林葉敦印一行每葉十八行每行十七字元刊元印本其標題之謬

四庫提要已痛詆之他如東坡廬山偈分爲兩條標

曰廬山老人亦謬之甚者觀此刊跋恐原本無標題如玉壺清話之例其標題乃元人所增故荒謬如此學津討原本出津逮秘書津逮本似卽從此本出惟標題又有刪節而其大謬處仍未改正葉敦無攷自著石林當爲夢得之裔疑元時坊賈耳

會通館本容齋五筆跋

容齋隨筆十六卷二筆十六卷三筆十六卷四筆十六卷五筆五卷明無錫安氏會通館照宋紹定元年周某刊本以活字印行初筆前有何異序二三四筆皆有自序五筆後有丘橐跋洪級跋周某刊板跋每半頁十八行每行十七字語涉宋帝或提行或空一格宋諱多缺筆益悉照宋刊摹寫者板心有會通館活字銅板印及弘治歲在旃蒙單闕等字以宏治李瀚刊本互校隨筆卷十一小貞大貞条若齊鬱林王知下奪五十餘字詩以見意以下乃唐詩戲語條之

下半段脫去上半二百一字誤連爲一四筆卷八前
後藝文下奪六十餘字其或疾疫連數州以下乃承
天寺塔條之下半段脫去上半二百餘字誤連爲一
想安氏所藏宋本有闕頁故有此誤兩本皆刊於弘
治中皆以宋本重雕李本似以宋本上板故少奪落
此本以活字擺印略更行欵故奪誤較多而丘櫛洪
級周某三跋則爲此本所獨皆不失爲善本兵燹之
後李本固稀如星鳳此本則尤爲江南藏家所珍耳

履齋示兒編跋

新刊履齋示兒編二十三卷題曰廬陵鄉先生孫奕
季昭撰顧千里校宋胡楷刻本目後有嘉定癸未胡
楷重刊跋提要云其歷官無考第十卷中稱紹熙丁
巳三月侍講春華樓聞大丞相周益公議論考之宋
史紹熙元年爲庚戌至五年甲寅卽內禪丁巳實慶
元三年殆甯宗時嘗官侍從傳寫誤爲紹熙歟愚案
履齋仕履除提要所述外別無可攷勞格雜識至以
北宋之孫奕當之尤爲張冠李戴惟元蘇天爵滋溪
集有題孫季昭上周益公請改修三國志書稿稱宋

鄉貢進士孫季昭嘗三上書益國周公請改修三國
史志以正漢統五世孫義方藏其稿于家云云則亦
留心史學者曰鄉貢進士則僅登鄉解而未第進士
矣胡楷廬陵人淳熙四年鄉解見江西通志遍檢江
西通志紹興至慶元鄉解題名並無李之名楷跋自
稱晚學則李之發解必在楷之前惟紹興二十二年
有孫逢年淳熙元年有孫遜功孫光宗皆廬陵人李
或發解後改名惜無確証耳

考古質疑跋

考古質疑六卷宋葉大慶撰原本久佚此則館臣從永樂大典錄出以聚珍版印行者也提要云宋史無傳亦不見於藝文志其里貫則序文不具莫能詳也愚案大慶字榮甫處州龍泉人嘉泰三年進士當時以詞賦知名嘗官建州州學教授見處州府志前有葉武子序武子字成之邵武人受學於朱子嘉定甲戌進士調彬州教授歷國子正知處州有善政見宋景濂集葉氏先祠記及八閩通志序作于寶慶丙戌殆武子官處州時作歟

密齋筆記跋

密齋筆記五卷續一卷宋謝采伯撰其書久佚乾隆中館臣始从永樂大典錄出提要云宋史無傳其事迹不甚可考官爵名字僅見於陳者卿赤城志中愚案采伯紹定間知徽州郡與衢嚴接壤前歲盜發常山采伯獻言于朝調精兵遏其衝賊不敢出因萃兵四境平之嘗禱雨感應虎豹遁迹民立生祠祀之後轉中奉大夫見徽州府志是采伯學問政事均有可觀未可以戚畹輕之

元槧困學紀聞跋

困學紀聞二十卷或題浚儀王應麟伯厚或題浚儀
王應麟伯厚甫前有至治二年秋八月壬辰陞山牟
應龍序其下印文三曰牟應龍印曰牟伯成父曰儒
林世家泰定二年門人袁桷序目前有深宵白識二
十卷後有孫厚孫甯孫校正一行慶元路儒學學正
胡禾監刊一行末有泰定二年十二月癸卯慶元路
儒學教授吳郡陸晉之後敘每葉二十行每行十八字
蓋是書初無刊本泰定中馬勿速爲浙江廉訪副使
保定孫楫爲僉事分治慶元以袁桷等呈請始命慶

元學以學儲刊行而梅倡助刻資學官陸晉之等繼之乃始有成蓋初刊祖本也

隱居通議跋

隱居通議三十一卷題曰南豐劉壘起潛著案壘聰敏好書博覽古今宋末與同里諶祐以詩文鳴年三十七而宋亡又十八年薦署州學正年七十受朝命教授延平年七十八卒見江西人物志壘自云開慶元年年二十則祥興二年宋亡年當四十延祐己未重題梅氏海棠詩周甲重開年八十與卒年七十八不合若宋亡之歲年三十七則延祐己未當年七十七與卒年七十八合與開慶元年年二十延祐己未年八十又不合矣未知孰是李義山字伯高江西豐

城人修己之子嘉定進士授大宗正兼金部輪對言
爲善不可有疑心去惡不可有悔心並陳進善不能
無疑者三去惡不能無悔者三由是出知吉州後以
湖南提刑攝漕帥楚俗尙鬼有妖覲譚法祖假禍福
惑人義山曰此張角孫恩之漸也斬法祖毀其祠歷
階中正大夫著有後林遺稿思過錄見江西林志厲
樊榭宋詩紀事非但不詳義山仕履誤以豐城人爲
嘉魚劉壘以爲江東提刑守池州疑亦有誤

秦西岩影宋寶慶本類說跋

類說五十卷前有紹興六年曾慥序寶慶丙戌葉時序子卷與清思軒本同每卷有目連屬篇目書名下間不箸撰人每條之目接連本文以墨線隔之每葉二十行每行十八字書錄解題卷數同郡齋讀書志作五十六卷明天啟六年岳鍾秀刊本分爲六十卷刪削屢亂甚多非足本

四庫著錄之本亦分六十卷蓋皆以子卷隨意分析耳是書先有紹興麻沙刊本寶慶中葉時知建州思得大字善本徧令搜訪知併小字版亦不存因以所

藏是正鈔板郡齋此卽從葉本傳錄者其序尙摹時
手書也與清思軒本互勘分卷旣不盡合去取微有
參差想皆葉時所更定者

提要云麻沙坊本其板亡佚葉時重鈔亦不可復見
則舊本之罕見可知余旣有傳錄麻沙小字本又得
影寫寶慶本何快如之卷一有酉岩山人藏書朱文
長印卷四未有姑蘇吳岫珍藏白文方印蓋先爲秦
酉岩所藏後歸吳方山者

傳錄宋麻沙本類說跋

新雕類說五十卷前有總目卷一卷十四卷十九卷
二十七卷三十卷三十六卷三十七卷四十二卷四
十六卷四十七分上下卷卷二十六卷四十分上中
下三卷實六十四卷每卷有目連屬篇目采書二百
五十九種拾遺總類所采四十餘種不與焉書名低
二格有撰人者各注撰人每條有目低三格每葉二
十二行每行二十二字版心有清思軒三字是書紹
興庚申始刊于建陽之麻沙字小而刊不精見寶慶
本葉時序余見宋刊殘本每葉二十行每行十八字

書名大字本文雙行小字如蘭雪堂蔡中郎集春秋
繁露會通館本容齋隨筆之式當卽葉時所謂紹興
麻沙本也此本似从麻沙本傳錄以秦西岩傳錄寶
慶本互勘此本較有條理而屢奪較多卷一穆天子
傳天子之弓條後脫造父三百一條計二十餘字飛
燕外傳冷元自序在前無荒田野草之目卷二王老
條前奪續仙傳標目及漁父詞踏踏歌掘枸枸三條
計二百五十餘字雨塵條後奪李八百一條計二十
五字蓋麻沙本雙行小字此旣一律改寫大字所據
本又有缺葉有錯訂之葉故屢奪較多耳

影宋酒經跋

酒經三卷卷一文隱翁自序卷二麴法卷三酒法每
葉十行每行十六字版心有字數及刊工姓名桓字
缺筆蓋從北宋末刊本影寫者後有某氏手跋云酒
經一冊乃絳雲樓未焚之書五車四部盡爲六丁下
取獨留此經天殆縱余終老醉鄉故以此轉授遵皇
令勿遠求羅浮鐵橋下耶余已得修羅採花法釀仙
家燭夜酒視此經又如餘杭老媪家囊俗譜耳辛丑
初夏戲書觀其辭義當出錢謙益乎蓋絳雲火餘後
歸錢遵王也是固者鮑淥飲知不足齋刊本每葉九

行每行十六字與此本行欵不同其餘多同據鮑跋
借之吳枚菴枚菴得之玉峰徐瓚蓋與此本同出一
源卷中有鄭杰之印白文方印昌英珍秘朱文方印
鄭氏注韓居珍藏記朱文長印

元槧考古圖跋

考古圖十卷前有呂大臨序大德己亥茶陵陳才子
陳翼子題識每卷有目題默齋羅更翁考訂據才子
序書本巨編翼子屬更翁臨刻始縮小証以

提要所舉卷一卷四卷六卷八卷九卷十缺文顛倒
皆同蓋明泊如齋寶古堂本皆從此出也遵王明季
人藏有完善宋刻大德在遵王前幾四百年完本必
易求乃以不全之本付梓殊爲可惜繪圖亦不及明
刻之精惟葉數缺處皆留空葉尙有形迹可尋明刻
連屬以泯其迹則謬矣

續攷古圖跋

續攷古圖五卷始見于讀書敏求記不著撰人

四庫及

天祿琳琅所著錄卽遵王藏本余借潘伯寅尙書藏本付梓僅據翟耆年籀史知釋文爲趙九成所撰心疑續圖或亦出九成而無証據近讀李邴嘯堂集古錄序有云鼎器款識絕少字畫復多漫滅及得呂大臨趙九成二家攷古圖雖有典刑辨識不容無外據此則續圖亦九成所輯也

元槧宣和博古圖跋

至大重修宣和博古圖三十卷每葉二十行每行十七字版心間有字數及刊工姓名其圖依樣製者旁注依元樣製四字縮小者旁注減小樣製四字明嘉靖七年黃景星刊本與元刊本同泊如齋寶古堂本版既縮小而依元樣製減小樣製等字皆削去矣書爲徽宗時撰元人不加一字至大重修之名殊不可解蓋靖康之亂金人盡輦汴京圖籍書版而北見靖康要錄及北盟會編自金入元版已殘缺竊意前後必有王黼等進表及纂修校勘銜名元人修補刊完

惡其人而去之故改題至大重修之名其版則猶宋刊居多也首行至大二字或小或大或疏或密與重修宣和博古圖錄卷第幾各字氣既不貫字之工拙懸殊亦以宋刊挖補之一証也據蔡條說書成于大觀初容齋隨筆又稱政和中置局疑宋本已有政和重修字樣元人收政和爲至大惜無確證耳卷中有漢唐齋印白文長印馬玉堂印白文方印笏齋二字朱文方印海鹽馬笏齋孝廉舊藏也

元槧藝文類聚跋

藝文類聚一百卷次行題唐太子率更令弘文館學士歐陽詢撰前有詢自序後有無名氏跋每葉二十八行每行二十八字明嘉靖陸采本行款皆同疑卽從此本出無名氏跋有云今書坊宗文堂購得是書卽便命工葉行溥傳海字售播四方賢哲士夫以廣斯文幸鑒愚案元刊劉靜修集卷一後有墨記云至順庚午宗文堂刊木記則宗文堂必元代麻沙書坊是書亦至順中刊本也書中有徐氏興公白文方印曾在李鹿川處朱文長印鄭杰之印白文方印注韓

居士白文方印一名人杰字昌英朱文方印侯官鄭氏藏書印朱文方印注韓居珍藏記朱文方印劉氏小墨莊藏朱文方印侯官劉筠川藝文金石記朱文方印曾經筠川讀朱文方印徐興公名燭字惟起閩縣人萬厯間與曹能始狎主閩中詩盟聚書至數萬卷或題其端或書其尾見明詩綜李鹿川鄭杰劉筠川皆雍乾間福建藏書家是書明凡四刊有蘭雪堂活字本有閩人銓本有陸采本有大字本元刊則惟見此一種耳

宋槧白孔六帖跋

唐宋白孔六帖存卷一至卷三十八止每葉二十行
每行十九字小字雙行左線外有篇名先白後孔以
黑質白章白孔二字別之每類子目亦以黑質白章
爲別白孔本別行白帖名白氏六帖類聚余藏有之
孔續六帖三十卷前有乾道丙戌韓仲通序今歸

內府此爲南宋合刊本字體與陸狀元通鑑蔡氏草
堂詩箋相仿宋諱或缺或否蓋南宋光甯以後福建
刊本也卷中有宋本二字朱文橢圓印東海二字朱
文長印傳是樓朱文長印徐仲子朱文長印章仲二

字朱文連珠印徐氏章仲朱文方印別號自疆白文
方印壬戌二字朱文方印臣炯二字朱文方印花谿
二字朱文方印徐章仲所讀書朱文長印陳氏秋鴻
朱文方印友鞠軒朱文長印汪士鐘印白文方印閩
源真賞朱文方印

儀顧堂續跋卷第十一

歸安陸心源伯剛甫著

明抄職官分紀跋

職官分紀五十卷前有元祐七年秦觀序次引用書目注曰凡三百二十書次目錄明綿紙館抄本每葉二十四行每行二十二字小字雙行每卷有目連屬篇日書錄解題著錄題曰富春孫逢吉彥同撰秦觀序之元祐七年也

四庫提要以逢吉隆興元年進士紹熙五年代朱子講討距元祐一百三年駁其誤謬是矣愚攷淮海集

亦無此文惟所採各書及所敘官制均至神哲時止
徽宗以後無一字頗疑爲北宋人作因而遍攷各書
知宋時孫逢吉有三一蜀人孟昶時爲國子毛詩博
士附宋史勾中正傳一吉州龍泉人字从之隆興元
年進士官至權吏部侍郎謚獻簡宋史四百四有傳
生紹興五年卒慶元五年著有靜閱居士集七十卷
外集三十卷樓攻媿撰神道碑不字彥同亦不言著
有職官分紀一杭州富春人字彥同浙江通志有傳
卽著此書者所採五代史職官志爲薛史舊文邵二
雲輯薛史時僅校內職一條其餘尙未詳校其採宋

代事迹頗有出宋史外者亦攷宋史者所當攷也余又藏有舊抄本每葉二十行每行二十二字較此本脫謄極多卷一摠序後魏百官志主受詔令後脫二十行卷二太宰門脫宋百官志一行以三公攝冢宰後脫四行大司馬門春秋運斗樞未脫一行又脫管子二行吳志後脫晉職官志晉公卿禮秩宋百官志齊百官志齊職儀四條計二十行驛入後一葉卷三缺目錄與此本同而衍二行此外各卷驛奪大略相同是書宋以後無刊本傳抄多謄余所見所藏亦祇二本當以此本爲最善也

舊鈔職官分紀跋

職官分紀五十卷前序引用書目目錄每卷有目皆與明鈔同惟改每葉二十四行爲二十行耳書中有謙牧堂藏書記白文方印某會里朱氏潛采堂藏書朱文長印小長蘆朱文長印朱彝尊錫鬯父白文方印葢曝書亭舊藏後歸謙牧堂者順德李石農侍郎从南書房借鈔半部光緒己丑典試浙江攜其所鈔屬爲校正補完行款與此同余命兒子樹藩爲之校對李抄尙多脫落葢以此本較明抄則抄爲勝以李抄校此本則此亦尙爲善本耳

元槧山堂攷索跋

山堂先生羣書攷索前集六十五卷後集六十五卷
續集五十六卷別集二十五卷題山堂宮講章如愚
俊卿編前集日後有延祐庚申圓沙書院新刊木記
每半葉十五行每行二十四字標目別以黑質白章
以明正德戊辰劉洪慎獨齋刊本互勘明本頗有刪
削移易處如卷五中庸大學元本經下有注明本存
經刪注卷八六經門卷三十二文章門明刊先後顛
倒後集續集別集如此類者亦多此爲初刊祖本不
久卽毀于火故流傳甚少見慎獨齋鄭京敘勝慎獨

本遠甚中有趙賢白文方印藤蔭館白文方印胡爾
壙印朱文方印豫波朱文方印胡氏豫波家藏圖書
朱文方印胡爾壙字遠江平湖人嘉道中藏書家也

宋槧書判清明集跋

名公書判清明集前有景定辛酉日長至幔亭朱孫
序祇存末葉似卽幔亭所編也今存戶婚一門分二
十二類曰立繼曰戶絕曰歸宗曰分析曰檢校曰孤
幼曰女承分曰遺囑曰別宅子曰義子曰取贖曰爭
業曰違法交易曰偽冒交易曰墳墓曰屋宇曰庫本
曰爭財曰婚嫁曰離曰接脚夫曰雇妻計二百三十
六葉不分卷每葉十八行每行十六字前有各家名
氏

四庫未收各家書目皆未著錄所收陳抑齋釋徐意

一清叟 王留耕 伯大 蔡久軒 抗 史滄洲 彌堅 范西堂

應銓 章翼之 良肱 馬裕齋 光祖 宋自牧 慈 吳雨岩 勢

卿 翁丹山 合 王去非 遂 胡石壁 穎 翁浩堂 甫 陳廬山

嶺 劉桃菴 希仁 姚立齋 珺 葉息菴 武子 諸人箸述今

皆不傳藉是可見 涯略有浦玉田藏書記白朱文方
印留與軒浦氏珍藏朱文方印二酉齋朱文長印

是本歷代制度詳說跋

新刊歷代制度詳說十五卷題曰東萊先生呂祖謙
伯恭編崇元抄本每頁二十八行每行二十五字卷
一科目卷二學校卷三賦役卷四漕運卷五鹽法卷
六酒禁卷七錢幣卷八荒政卷九田制卷十屯田卷
十一兵制卷十二馬政卷十三考績卷十四宗室卷
十五祀事較

四庫所收多宗室祀事二卷考績門之首及錢幣荒
政兩門亦無缺頁乃是此書完本考績列卷十三不
列第三其分卷亦不同矣

明抄名賢氏族言行類稿跋

歷代名賢氏族言行類稿六十卷前有嘉定己巳章定手記明藍格抄本每頁二十六行每行二十二字提要云定建安人仕履無考愚案福建通志職官志章定嘉泰四年以承務郎知仙遊縣嘉定己巳上距嘉泰四年僅五年時代相合當卽其所載多五代以前事迹宋以後採錄寥寥自序謂文籍不備多所遺缺良不誣也

元刊元印玉海跋

玉海二百卷詞學指南四卷題浚儀王應麟伯厚前有胡助李桓序至元三年宣慰使公文阿殷圖夢堂序王介跋薛元德後序伯厚自序王厚孫跋每葉二十行每行二十字目錄後有慶元路儒學正玆桂克忠學正虞師道薛元德學錄汪興王壽朋直學陳眉壽學吏岑立道銜名五行校正對讀伯厚孫王厚孫王甯孫一行書寫王秉王陞楊德載一行刊字生張周士等三十人一行翁洲書院山長曹性之重校正一行紹興路高節書院山長金止善監督一行至元

三年乞里不花爲浙東道宣慰使據國子學博士趙承德呈請刊于慶元路學至正九年阿殷圖爲總管修補六萬字始成完書明初版歸南京國子監正德元年缺五十餘版正德二年缺二百餘版續修至萬曆止而元刊十不存一其存者多模糊不能辨又缺二百餘葉亦未補完乾隆中康基出爲江甯布政使以萬曆本重刊缺葉如故世不得見全本者久矣此本元刊元印無一缺葉字皆趙體無一斷爛誠天地間有一無二之本杭州書局重刻姚蓮槎主政就而宋樓校對補完三百年後復見完書賴有此耳有張

寬德宏之印朱文方印張任文房之印朱文圓印土
峰張氏世恩堂圖書朱文方印徐氏家藏白文方印
張任益崑山人後歸傳是樓者先是道光中上海郁
泰峰茂才

松年

以六白金得書于揚州鹽商家同治

初豐潤丁雨生

日昌

開府江蘇余過其官舍出以相

誇並載入澹靜齋書目所稱墨光燭天者也及余自
閩中罷歸有以郁氏書求售者余閱其目是書在焉
因以善價得之詢其何以仍歸郁氏之由知雨生介
紹應敏齋廉訪至郁氏閱書自取架上宋元刊本五
十餘種令材官騎士擔負而趨時泰峰已故家已中

落諸孫尚幼率其孀婦追及于門雨生不能奪取其
卷帙少者自置輿中其卷帙多者僅攜首帙而去後
經應敏齋調停以宋刊世綵堂韓文程大昌禹貢論
九朝編年毛詩要義儀禮要義金刊地理新書等十
種爲贈餘仍返璧余始恍然因念同治元年余隨李
筱泉制府權務廣東始與兩生共事時方以廬陵令
失守免罪尙未開復也及余備兵南韶兩生亦權蘇
松道篆余奉諱歸田則渠已開府矣余以訪書至蘇
兩生必先屏車騎過訪相見若平生後竟以爭搜古
書成隙念古人懷璧之戒因並識于此

元槧元印小學紺珠跋

小學紺珠十卷題浚儀王應麟伯厚甫前有大德庚子方回序大德辛丑牟應龍序及伯厚自序每葉二十行每行二十字版心刊紺珠字有字數及刻工姓名左線外有書名亦至元三年慶元路學刊本也康基田刊本黑釘缺文甚多此猶元時印本一無斷爛可以補諸本之缺

元槩元印姓氏急就篇跋

姓氏急就篇上下二卷題浚儀王應麟伯厚甫未有伯厚自跋署曰浚儀遺民蓋入元後所作也每葉十行每行大字二十小字雙行每行二十二字版心刊姓字有字數及刻工姓名左線外有書名行密字小俗本謬譌尤甚此本元時初印字字清晰自序雖有韻語在卷下後別爲一葉版心刊姓氏急就篇題辭五十一上十一字未知何故俗本連屬正文尤非

宋槧啟劄截江網跋

新編通用啟劄截江網甲集八卷乙集八卷丙集八卷丁集八卷戊集八卷己集六卷庚集六卷辛集六卷壬集五卷癸集五卷不著撰人前有歲在乙未正月元旦前進士陳元善序下有穎川二字鼎印建陽陳氏方印每葉二十八行行二十三字小字雙行四庫未收諸家書目亦未著錄蓋宋末元初麻沙坊刊也序稱熊晦仲哀集是書凡古今前輩之事實近日名公之啟劄皆網羅而得之自甲至癸分爲十集甲集則專舉諸式之大綱乙至癸則旁分品類之衆

目云云案熊晦仲無攷陳元善建安人開慶元年已未進士自署前進士者元延祐六年己未作也所採表箋奏狀書啟稟劄贊頌序記賦文箴銘歌詩詞曲皆載全文宋人詩集之不傳者如丁黼黃定朱湛盧翁溪園黃順之江萬里戴植哀長吉吳申黃革余日華李石才丁持正朱子厚徐霖楊長孺胡德芳張南卿周申趙福元祝穆卓田歐陽光祖牛子蒼程東灣任希夷羅子衍張家瑞劉樞張薄陳濬王容鍾將之尹德鄰劉光祖黃竹坡羅永年梁大年阮文卿李居厚劉浩范一飛吳申甫陳夢協葉實夫葉寅黃埒劉

閔風葉巽齋劉子襄史千劉省齋富偉蕭崩包日齋
蕭仲曷林橫舟林子晦張仲殊余去非嚴敦常張進
彥翁九万徐逢年劉子實潛放熊伯詩謝勉仲李子
清吳季子王大烈高子芳熊太經陳克王紹程節楊
補之李肯堂范炎程正同戴翼陳士豪趙汝恂石麟
章斯才李仲元鄭碩支子蒙程宣子劉鎮熊竹里江
成叔劉常軒程光遠龔九万蘇南疆熊克楊炎正林
觀過傳達傅儔傅大詢熊德修熊以甯吳景仲周丙
丘大發孫德之宋壺山蘇囿山徐清叟游慈譚去疾
張樵劉仲行張無隅葉夢鼎林霆龍僧不輕陳郁黃

少師女吳氏左瀛翁甫宋漁趙愚齋彭止劉恭甫黃
元壽張申子王桂陳鞞葉明馬子嚴王伯丈李遇嚴
少魯黃宙李梅礪趙善得張幼杰丘駢陳焯劉石菴
鄭暉老魏順之丁幾仲莫養正呂季已施子中游穉
仙劉澗谷林駟歐世昌祝洙錢之紀趙必愿陶璿趙
縉夫江仲容儲用盛勛商飛卿張汝明陳應行劉渭
董洪汪立中翟公英方雲翼朱廷瑞陳晉卿楊申徐
子元李顯卿辛楹厲模陳讜余崇龜王九万方信孺
李桂潘子高陳子文劉韜仲應鏞黃濤吳淇韓補高
吉邢凱趙恬齋蕭仲才章立菴鄭覺齋黃魯安劉焯

叔林宋偉于定國游清夫劉崇卿孟點朱南疆危科
牟子才張實甫丁仁吳順之李寅仲方味道汪相如
李敬則游志甫王其吳同山趙孟僖趙灌園陳若水
曾寓軒吳勢卿張輯之類今皆不傳可藉是以得其
梗概每卷有太原叔子藏書記白文長印子孫寶之
朱文方印案王聞遠號蓮涇蘇州人藏書極富有孝
慈堂書目

宋槧詩律武庫跋

東萊先生分門詩律武庫前集十五卷後集十五卷
目錄次題東萊呂氏編于麗澤書院前集目前有書
坊刊行木記四行卷一次行題呂氏家塾手編
四庫不收附存其目每葉十八行每行十九字前編
分十一門後集分十八門宋季麻沙坊本也中有高
子敬圖書記朱文方長印高麒朱文方印汲古祕本
書目延陵季氏宋元板書目江氏藝芸書舍宋元板
書目皆著于錄

永樂彙事林廣記跋

纂圖增新羣書類要事林廣記前集二卷後集二卷
續集二卷別集二卷新集二卷外集二卷前集題西
穎陳元靚編餘皆不著撰人元靚仕履無攷當爲福
建崇安人廣寒先生之裔廣寒先生名字無攷墓在
崇安其子名遜紹聖四年進士元靚必遜之裔也餘
詳歲時廣記序前集目錄後有永樂戊戌孟春翠岩
精舍新刊木記外集末有吳氏玉融書堂刊人形木
記每葉三十八行每行三十二字前集雖題元靚名
卷下地理類有大明混一圖郡邑類有直省布政司

則已爲明人羸入增新之名蓋由于此前集分天象
歷候節序地輿郡邑方國勝迹仙境八類後集分人
紀人事家禮儀禮農桑花卉果實竹木八類續集分
帝系紀年歷代聖賢先賢文籍辭章字學八類別集
分儒教學校幼學書法文房翰墨道教雜術修真佛
教圖畫十一類新集分官制俸給貨寶算法醫學卜
史選擇文藝武藝伎術十類外集分宮室衣服器用
音樂音譜閨妝茶果酒麴飲饌麪食牧養禽獸十二
類續集聖賢類有大元褒典帝系類記年類至元順
帝止字學類有蒙古字百家姓新集官制俸給兩類

皆明代制度蓋此書在當時取便流俗通用自元而明屢刻屢增矣中有毛晉二字朱文連珠印汲古主人朱文方印汲古閣三字朱文長印東吳毛氏圖書朱文長印子晉朱文方印毛氏子晉朱文方印毛晉私印朱文方印子晉書印朱文方印書雖明刊流傳極少各家書目皆未箸錄汲古閣祕本書目有其名注曰明珠裕抄本當卽從此本抄出者

元槧氏族大全跋

新編排韻增廣事類氏族大全分甲至癸十集不分卷癸集末夾谷姓下注曰大金支裔其爲元人所撰無疑前爲綱目一東至十虞爲甲集十二齊至二十七刪爲乙集一先至九麻爲丙集十陽爲丁集十二庚至二十七咸爲戊集一董至九慶爲己集十一薺至五十三謙爲庚集一送至五十四闕爲辛集一屋至三十二洽爲壬集覆姓爲癸集與

簡明目錄合每葉三十行每行二十八字元代麻沙本也所採宋事比章定書爲多

書癸辛雜識後

余友莫梅士孝廉謂周密所著癸辛雜識齊東野語
多污蟻正人之辭其人疑非端人余笑曰此渠家學
也其曾祖祕厯城人從高宗南渡常居湖州鐵佛寺
紹興五年吏部員外郎守監察御史擢殿中侍御史
七年有旨禁伊川學董莽不刊行錄黃祕劾莽沮格
詔令見繫年要錄胡文定安國請从祀邵張二程祕
劾文定學術頗僻行義不修見道命錄文定遂罷爲
提舉太平觀祕尋遷御史中丞十月再疏劾張魏公
尋乞補外除徽猷閣直學士知秀州九年知紹興尋

罷爲提舉江州太平觀十六年十一月卒見繫年要錄嘉泰會稽志宏治衢州府志秦檜主禁程氏之學陳公輔發之祕與石公揆助之至檜死而始解祕之劫董棻胡文定也在檜初罷相之後其劫張魏公也未幾而檜復相其人如非黨秦必與檜臭味相契者是則密之詆譏道學蓋亦家學也獨怪河間紀文達後道學諸公幾千年好拾密之唾餘以爲口實何也密爲似道客紀依埶和珅所謂方以類聚者耶

宋槧夷堅志跋

夷堅甲志二十卷乙志二十卷丙志二十卷丁志二十卷宋刊元印本前有古杭一齋沈天祐序每葉十八行每行十八字版心有刊工姓名夷堅志四百二十卷或刊于蜀或刊于婺或刊于杭此八十卷則刊于建甯學者至元而蜀浙之版已亡惟建版尙存缺四十三版張紹先爲福建提學命天祐尋訪舊本因從周宏羽借得浙本補刊完全此則元修後印本也四庫未收阮文達始從嚴久能借錄進呈卷中有季振宜藏書朱文長印芳椒堂印白文方印竹塢二字

朱文長印玉蘭堂白文方印辛夷館印朱文方印元
照之印白文方印嚴氏久能朱文方印張氏秋月字
香修一字幼憐朱文方印香修二字朱文方印梅溪
精舍白文方印阮元之印白文方印阮元伯元朱文
方印錢唐嚴杰借閱白文方印何元錫借觀記白文
方印江左二字朱文長印厚民二字朱文方印元照
私印朱文方印嚴氏修能朱文方印陸師道手錄寶
退錄一條于日後及卷一末小楷極精秦竹塢辛夷
館玉蘭堂皆文衡山印江左季振宜印芳椒堂嚴久
能印香修張氏久能姬人之印也

宋槧釋氏通鑑跋

歷代編年釋氏通鑑十二卷次行題括山一菴本覺
編集首爲採摭經傳錄次目錄起周昭王甲寅至五
代周世宗止每條各注所出書每葉二十二行每行
二十二字宋諱有缺有不缺宋季麻沙刊本宋史藝
文志元史補藝文志皆不著錄惟見于明文淵閣書
目季滄葦宋元板書目

四庫未收阮文達亦未進呈案本覺龍泉人博學能
詩文士大夫多與之游見兩浙名賢外錄其書始于
佛生之年既不若釋氏稽古略之侈談遠古遠引洪

荒唐昭宗後亦不妄增濮王紉一代記載頗爲核實
又不若釋念常佛祖通載列楊璉僧伽于禪宗去取
亦尚平允卷中有朱文石象玄氏陰陽文方長印案
朱大韶字象玄又字文石松江華亭人嘉靖二十六
年進士官至南國子司業家有文園收藏異書法書
名畫彝鼎壘洗甚富又有季振宜藏書朱文方長印
汪士鐘印白文方印與延陵季氏書目藝芸精舍書
目合

宋槧纂圖互注老子道德經跋

纂圖互注老子道經一卷德經一卷題曰河上公章
句注釋每頁二十二行每行二十一字小字雙行每
行二十五字宋景定刊本前有景定改元龔士高六
子全書序葛元道德經序初真之圖金丹之圖老氏
聖紀圖混元三寶圖蓋南宋國子監先有荀揚老莊
四子小字本建安書坊加以纂圖互注寫作大字爲
此本號四子見楊子序後木記景定中龔士高又加
文中列子爲六子耳其書先河上公注次解解曰二
字以黑質白章小字別之次互注互注二字以黑質

白章大字別之次音釋以圖圖之次重言重意以黑
質白章小字別之音切皆本陸氏釋文而不全錄所
稱解曰者不著作者姓名徧攷王弼蘇子由王雱林
希逸各注乃知出林希逸虞齋老子口義希逸福建
人士高亦福建人書亦建甯書坊所刊也士高字子
質號石廬子

元槩道德經集解跋

道德經集解二卷上卷次行題道經下篇下卷次行題德經下篇三行題曰清源圭山董思靖撰四行題章貢淵然道者劉若淵校刊前爲序說序說後題清祐丙午臘月望清源天慶觀後學圭山董思靖書案思靖生平無可攷惟清源圭峰皆福建泉州山名今泉州之元妙觀宋爲天慶觀元貞元間改名元妙由是推之則思靖乃理宗時泉州天慶觀道士也劉淵然贛州人祥符宮道士呼召風雷有驗洪武二十六年召至京師賜號高道館朝天宮洪熙初封沖虛至

道元妙無爲光範演教光靜普濟長春真人宣德中
卒年八十二見江西通志書題淵然道者不題賜號
未入明時所刊其爲元刻無疑吾友魏臨尹錫曾用
諸本互校中有絕異他本與影龍石本合者蓋所據
猶古本也所採司馬溫公王荆公葉石林程文簡諸
家之說今皆不傳賴是書存其涯略各家書目皆未
著錄

四庫未收阮文達亦未進呈亦罕覩秘笈也

老子口義跋

老子虜齋口義二卷題虜齋林希逸老子頂格口義
低一格前有發題

四庫未收阮文達亦未進呈此明正德戊寅胡長活
字本大旨謂老子借物以明道因時世習尙就以諭
之而讀者未得其所以言前後注解皆病于此獨穎
濱得其近似而語脉未能盡通自謂推究得其初意
云經文衆人熙熙如春登臺不作如登春臺與唐石
刻同所見猶善本也

列子口義跋

列子膚齋口義上下卷題膚齋林希逸行欵與老子口義同亦正德活字本前有劉向奏謂穆王湯問失之迂誕力命楊子義亦乖背不似一家之言其言實爲中肯奏後有希逸序謂向奏鄭繆公同時繆爲繻字傳寫之訛書果出景帝時太史公不應不見見之不應不列傳其奏未必出于劉向書爲晚出或因其不完模倣莊子以附益之然真僞亦不可亂云云無注家回護之習視江適之附和方士者相去遠矣

宋槧南華真經跋

纂圖互注南華真經十卷題曰晉郭象子元注唐陸德明音義前有郭象序莊子太極圖行欵字數皆與道德經同釋文皆全錄于郭注之下以小圓圈隔之凡釋文所標之字皆以圈圍之互注重言重意欵式與道德經同世德堂本雖從此出已多別風淮南之訛書貴舊本良有以也

元槧易外別傳跋

易外別傳一卷前有至元甲申古吳石澗道人俞琰
自序卷終下有孫男楨拜書五字附元牝之門賦水
中金詩後有至正丙申男仲溫跋下有印二曰南園
曰俞仲溫印又林屋洞天石澗真逸俞琰玉吾叟書
元同子跋每葉二十四行每行二十一字元刊元印
本其字則俞貞木手書上板者也

舊抄抱朴子跋

抱朴子內篇二十卷外篇五十卷前有葛洪序每葉二十行每行十七字別旨在內篇之後外篇之前各爲起訖不相連屬外篇卷十一卷二十四二十五卷二十六二十七卷二十八二十九卷三十二三十三卷三十四三十五卷三十六三十七皆相連屬不隔流水卷十四之後半葉接卷十五卷三十一之後半葉接三十二皆宋元刊舊式明以後所無者顧千里黃蕘圃以嘉靖己丑魯藩本正統道藏本校過明刊以魯藩爲善分七十卷此本凡與魯藩本異者與

道藏本同或从元刊抄出或从宋藏抄出雖不可攷其非从明刊抄出則無疑也平津館本大略多同惟削別旨一篇間有據他書增補處明盧舜治本亦用魯藩道藏兩本校惟上下篇各并爲四卷以別旨一篇附內篇末亦間有肌增一二字處雖無刪削要不如此本之善外篇卷四十九有姑蘇吳岫塵外軒讀過朱文方印卷五十有吳岫朱文方印堯圃手校朱文方印及朱筆題字前後有嘉慶丁丑癸酉堯圃兩跋吳岫字方山嘉靖時蘇州藏書家與沈辨之與文友善